



# *Kattusseqatigiit Partiiat*

27 Juni 2011

Inatsisartut suleriaasianni § 37 naapertorlugu apeqquteqaat imaattoq Naalakkersuisunut ingerlateqqippara:

**Naalakkersuisunut apeqqutit:**

- 1. Aalisartumut inuussutissarsiutiminik aallusserusuttumut siuarsaarusuttumulluunniit aningaasaliivigineqarnissamut imaluunniit aningaasatigut taperneqarnissamut periarfissat suuppat?**
- 2. Aalisartup ingerlataanut umiatsiaanulluunniit akiligassanik taperneqarsinnaaneranut periarfissat ullumikkut suuppat?**
- 3. Qanoq annertutigisumik aalisartoq annerpaamik taperneqarsinnaava?**
- 4. Qinnuteqartoq taperneqarnissamut periarfissaqartinneqarsaguni sunik qanorlu piumasaqarfigineqassava?**
- 5. Nunamut qanittumi raajarniutit qassit massakkut aalisarpat.?**
- 6. Nunamut qanittumi kilisaatit angisuut qassit aalisarnissaminnut akuersissummik peqapat.?(Assersuut Lumor.)**
- 7. Naalakkersuisut Nunamut qanittumi kilisaatit marlorsortut aalisarnerisa akuersissutaat atorunnaartinneqarnissaanut pilersaaruteqarpat.?**
- 8. Aalisarnermut inatsisip aappaassaaneerpeqannginnerani innuttaasunut Naalakkersuisup paasititsiniaalluni angalanissaa qanoq pilersaaruteqarpa?**

(Inatsisartunut ilaasortaq Knud Fleischer, Kattusseqatigiit Partiiat)

**Tunngavilersuut:**

Apeqquteqaatini tapeeriaatsit aalisartunut ilusilersorneqarsimasut pineqanngillat, kisiannili inuussutissarsiornermut tamaginni tapeeriaaseq aalisartut inuussutissarsiuteqarnermikkut periarfissariligassaat pineqarluni.

Tapeeriaatsit assigiinngitsut ullumikkut periarfissaareersut aalisartumut immikkoortikkuminaassinnaapput. Aammattaaq ajornakusoorsinnaavoq paasissallugu tapeeriaatsit qanoq piumasaqaatitaqartinneqarnersut.

Ilaatigut tapeeriaatsit ataatsimut qulaaniit isigisinnaanissaat, ullumikkutut isikkoqartillugit, pisariaqarpoq, aamma sunniutaasa oqallisigilluarsinnaanissaat, imminnut naapittuuneri kiisalu siunertap tapiiffigineqartumut eqquutsinneqarsimaneri eqqartorneqarsinnaasariaqarmata.

Ilaatigut aalisarnermut inatsisip 13. april 2011 siullermeerneqarnerani oqallinnermi erserpoq Naalackersuisut aningaasaqarnermut inatsisissap 2012 kiisalu ukiunut tallimanut tulliuuttunut aningaasat aalisarnerup allanngortisarnissaanut immikkoortinnissaat pilersaarusiussangaat. Tamanna tunuliaqutaralugu taamaammat pingaaruteqarpoq aningaasat immikkoortinneqartussat maannakkullu taperneqarnissamut periarfissat pioreersut ataatsimut katitinneqarnissaat, taamaalilluni imminnut qalleraannissaat aammalu tapeeriaatsit tammararnissaat nutaallu piulernissaat aalisartunut ajornartitsiumaartussat pinngitsoorniarlugit.

Apeqqutit ullut qulit suliffiusut qaangiutsinnagit akineqarnissaat piumasaraarput.